

# E Prikiichi di Kòrson

*Aratinga pertinax pertinax*

CARMABI foundation



Sponsored by:



Caribbean (Rinokosh) di Nasionan di Pashipadanti

## Kontenido

- Stail di bida...	2
- E prikichinan di Aruba i Boneiru...	2
- Anatomia...	3
- Bida sosial...	4
- Reprodukshon...	4
- Kuido di yu...	5
- Menasanan...	6
- Kon mi por opservá e animalnan aki?...	6
- Bo ke sa mas?...	6
- Bo ta sa ku?...	3
- Diferensha entre prikichi i lora...	5
- Poster...	8

## Tuma kontakto:

Tur nos informashon di kontakto riba un rei:

### CARMABI sectie NME

Piscaderabaai z/n  
Postbus 2090  
Willemstad  
Nederlandse Antillen

Tel nr. 462-4242 (ext.11)

Fax. Nr. 462-7680

Email: [educatie@carmabi.org](mailto:educatie@carmabi.org)

Website: [www.carmabi.org](http://www.carmabi.org)

Nos ta spera ku e página informativo akí a kontribuí na un charla i/o trabou eksitoso. Konseho i sugerensianan naturalmente ta bon biní! Djis mail nos na e adrès ariba mensioná òf yama nos. Pa mas informashon tambe bo por tuma kontakto libremente ku nos.

CARMABI su meta ta pa traha riba un desaroyo duradero. Esaki e ke logra, hasiendo investigashon científiko, ku kuido di naturalesa i edukashon ambiental!

### Potrènan:

Michelle da Costa Gomez  
Peter van der Wolf

### Diseño gráfiko:

Michelle da Costa Gomez

### Eskritor:

Sylvienne Martina

### Tradukshon Papiamentu:

Sylvienne Martina

### Editor:

Stella van de Windt  
Michelle da Costa Gomez

### Finansiamentu:

Banco di Caribe

Ken no konosé nos prikichi? E paranan koló bèrdè briyante, ku ta hasi hopi bochincha, ora nan ta pasa den gruponan grandi banda di nos kasnan. Ku nan koló bunita, ambiente i aparenzia radiante nan ta hasi hopi impreshon riba hende. Asina ku nan haña un palu di Wabi ku fruta hechu, nan ta bai sinta den dje, pa nan saboriá di nan. Tambe bo por mira nan, ora nan ta sinta riba e kadushi i datunan pa nan kome e frutanan òf ora ku nan ta bula den grupo tras di kualke Warawara ku a subi nan teritorio di buska kuminda. E prikichinan aki ta hopi popular serka turistanan i hendenan lokal, pa nan kria pa bestia di kas. Lamentablemente esaki ta kousa ku hende ta fangu e animal aki hopi I asina pone su sobrevivensia na peliger. Laga nos ban wak e animalnan presioso aki di serka.

## Stail di bida

E promé kos ku ta resaltá di prikichi ta e plumanan bunita den kasi tur kolo di regenbog: blou, bèrdè, hel I oraño. E plumanan aki ta garantisá ku e prikichinan ta wanta kayente pa nan kurpa no kue friu ( ora nan muha dor di awa seru por ehèmpel), pa nan move bai dilanti (manera ora nan ta bula) i pa kamuflahe ( un prikichi den un palu ku blachi bèrdè ta kasi invisibel). Tambe e plumanan ta yuda nan duna sierto señal. Asina bo por wak p.e mas fásil serka algun para kua ta hembra i kua ta machu. Hopi biaha nos no ta mira e diferensha serka e prikichinan pero entre nan mes si nan por rekonosé otro.

Hopi hende ta kere ku tur pluma di un para ta mes un kos, pero si bo wak bon bo ta mira ku e animalnan tin diferente tipo di pluma. Esaki ke men ku e plumanan ta mustra diferente I ta hinka den otro na un forma diferente.

Nos por parti e plumanan den tres grupo grandi: e plumanan grandi (grote veren), e plumanan ku ta tapa (dekveren) i e “donsveren”nan. Riba e plachi bo por mira kaba ku tur e plumanan aki ta mustra diferente. E “donsveren”nan ta manera pluis I ta mantené e animal kayente. Mayoria biaha bo ta haña esakinan hopi serka di su kueru. E plumanan ku ta tapa ta e plumanan ku bo ta mira parti pafó di su kurpa. E plumanan grandi ta esnan di mas largu. Esakinan bo ta haña mayoriamente riba su alanan I su rabu.

Prikichinan yòn ta paranan ku ta keda den nèshi. Esei ta nifiká ku ora ku nan nase nan ta nase sunú i nan no por yuda nan mes, nan tin ku haña kuido di nan mama promé ku nan sali for di nèshi despues di mas o ménos 3 siman. Despues di un temporada nan ta haña nan promé plumanan, e “donsveren”nan. Despues ta sigui e plumanan ku ta tapa i pa delaster e pluma grandi nan. Ora ku bo haña plumanan di para bentá abou den bo kurá bo mes por nota e diferensia. Algun ta chikí i moli, otronan ta largu i rondó òf largu i punta.

## E prikichinan na Aruba i Boneiru

Na e tres diferente islanan ta biba tres diferente subsorto di e Aratinga pertinax. Na Kòrsou ta biba e Aratinga pertinax pertinax, na Boneiru e Aratinga pertinax xanthogenius, I na Aruba e Aratinga pertinax arubensis.

Nan tur ta diferente for di otro. E prikichi boneriano ta esun di mas



kolorido. E parti dilanti di su kabes, na banda di su kara i su garganta ta hel ku oraño. For di su pechu e kolo ta varia di hel pa un kolo manera sitrun/lemon. E prikichi di Aruba ta ménos

remarkabel. Su pechu ta maron kla, pero su garganta i alanan ta un bèrdè briyante ku punta blou.

## Anatomía

E prikichi di Kòrsou tin un largura di 26 cm, for di kua kasi mitar ta e rabu. E plumanan ta koló bèrdè di yerba i e patronchi riba su kabes ta úniko. Úniko pa motibu ku kada un di e islanan chikí tin su mes prikichi ku ta endémiko. Kada un tin un pintura diferente riba nan kabes.

E prikichi di Kòrsou su kabes ta mayoria parti koló oraño hel dòf i riba su kabes e tin un pèchi bèrdè. Nèt riba su wowo e tin un tiki koló blou i su frenta ta e koló oraño hel. Manera nos a bisa anteriormente, nos por parti e plumanan di un para den tres grupo: e plumanan grandi (grote veren), e plumanan ku ta tapa (dekveren) i e “donsveren”nan. E “donsveren”nan tin e funshon di mantené e kayente ya asina e para su temperatura di kurpa ta keda nan nivel. Riba

esei e ta haña e plumanan ku ta tapa ku sa wòrdu yamá “contourveren” tambe. E plumanan aki ta sòru pa e para no haña resistensia di airu ora e ta bula. Pa delaster nos tin e plumanan grandi ku tambe ta wòrdu yamá “pennen” ku bo ta haña na su rabu i e kabamentu di su hala. E plumanan aki ta esnan ku ta hasi ku e para por bula. Nan tin e forma adekuá pa nan por yuda e para pusha su mes dilanti i lanta buelo. E pik di e prikichi ta altu, ku un koló kla i e parti ariba tin un bog aden. E patanan di e prikichi ta sumamente partikular. E tin dos tenchi ta mustra dilanti i dos ku ta mustra patras. Esaki ta yuda nan di manera ku nan por wanta nan mes riba takinan di palu i tambe subi palunan via nan tronkon.



Pik skèrpi ku kua e animalnan por habri nechi i pipita. Nan por kome fruta di datu tambe si tin molèster di e sumpi-ñanan.

E prikichi di Kòrsou tin un ‘masker’ hel/oraño briyante.

E plumanan ta blòu- bèrdèdi koló i ta lombra den lus di solo. Bo no por mira na e koló si ta trata di un machu of un hembra.

E pianan ta kòrtiku i fuerte. Prikichi hopi biaha ta tene nan kuminda manera bonchi di Wabi ku nan tenchinan mientras nan ta mastiká.

### Bo ta sa ku?

- Prikichi ta fásil pa hasi mansu. Esaki ta hasi nan hopi atraktivo pa hende ku ke tene nan komo bestia di kas. Paranan yon ku a kaba di sali for di webu ta wòrdu saká for di nan nèshi i kria na man...

### **Bo ta sa ku?**

- Ku den Christoffelpark, un área di naturalesa ku ta protehá, hende ta kibra nèshi di prikichi i ta horta yu di prikichi.

### *Bida sosial*

E prikichinan di Kòrsou ta bestianan masha sosial. Nan ta biba den gruponan grandi ku tur dia ta bai buska kuminda. E gruponan por varia di 2 para te ku gruponan di mas ku 20. Nan no ta bula di un isla pa otro si. Distanshanan largu ta keda difisil pa nan. Asina ta ku e prikichinan di Kòrsou ta keda akinan i esnan di e otro islanan no ta bula bin di bishita nan so.

Prikichi gusta kome nechi I fruta. Nan kuminda ta konsistí prinsipalmente di e bonchinan di palu di Wabi, Dividivi i Indju. Si nan topa ku palunan di fruta tambe nan lo kome for di nan. Nan ta stima

e frutanan di e kadushi, datu, mospel, mango, shimaruku i tambe tamarein. Nan gusta e frutanan di Korona di la Bírgen, e frutanan di cactus manera Datu I Kadushi I tambe sòrsaka. Tambe nan gusta maishi chikí i te asta nan ta kome e frutanan di palu di Mansaliña.

Hopi biaha nan ta kome masha slordig mes, dal un par di hap for di un fruta I benta e parti di mas grandi abou. Paga bon tinu ora bo kana bou di un palu ku un grupo di prikichi ku ta kome. Bo por haña un pipita di un fruta riba bo kabes I nan ta pupu entusiastmá ora nan kome.



“E prikichi aki ta sinta kome e floran di un palu di Brasia.” Portrèt saká na Cas Abou dor di M. da Costa Gomez

### *Reprodukshon*

E prikichi di Kòrsou ta usa e burakunan den piedranan di kalke, nesnan, burakunan den baranka, burakunan den tronkon di palu i

prinsipalmente nèshi di komehein pa traha nan nèshi. Den kaso ku nan skohe pa un nèshi di komehein, nan ta koba un pasashi ku nan pik. E



“Un nèshi komehein ku un nèshi di prikichi aden. Por-  
trèt saká den Christoffelpark dor di M. da Costa Gomez

pasashi aki tin un hanchura di mas o ménos 7 pa  
10cm i un largura di 50cm. Na final di e pasashi  
bo ta haña e nèshi.

E nèshi tin un forma oval i tin un hanchura di  
25cm i un altura di 15cm. Esaki ta e sorto di nèshi  
mas konosí riba nos isla.

E nèshinan di komehein ku e prikichinan ta usa pa  
traha nan nèshi, no ta nèshi bashí.

E komeheinnan ta laga e prikichinan usa un parti  
di nan nèshi turesten nan mes ta muda bai un otro  
parti. E kayente ku e komeheinnan ta produsí  
ta yuda e prikichinan tambe ora nan ta brui e  
webunan. E prikichinan no ta kome komeheinnan.

E sòldánan di e komehein ta protehá e nèshi ku

vigor I ta pone ku e yunan di prikichi ta relativamente protehá kontra enemigunan. E yunan no mester tin  
miedu di e komehein ya ku esakinan no ta hasi nan nada.

Ora bo pasa den un área di naturalesa bo no por falta di mira e nèshinan di komehein kologá den palu.

Mayoria biaha bo por haña un buraku ku ta indiká un nèshi di prikichi. Si tin yu den e nèshi ainda bo lo  
mira e mayornan di nan sinta den un palu no muchu leu for di e nèshi. Si bo aserka e nèshi muchu serka  
na ta lanta bula miéntras tantu nan ta grita tantu. Asina nan ta purba di tene peliger leu for di e nèshi.

## Kuido di yu

Prikichi ta brui den òf nèt despues di temporada  
di áwaseru. Den e periodo aki nan ta haña  
kuminda fásil. Si tin hopi kuminda nan por pone  
webu mas ku un biaha pa aña. Si kuminda ta skars  
nan no lo pone webu.

E webunan ta blanku I tin un kaska duru. Mayoria  
biaha e animalnan ta pone 5 webu den e nèshi.

Prikichinan ta biba prinsipalmente den mondi,  
kaminda nan por haña kuminda i protekshon  
kontra nan enemigunan (predadornan i hende)  
fásil. Ora ku nan ke kuminsá traha nan nèshi,  
nan ta haña e kamindanan mas adekuá (nèshi di  
komehein). Bo por topa nan tambe den e áreanan  
seku di nos isla manera nos kosta Nort i e serunan  
seku. Den áreanan manera e delaster menshoná  
nan ta kome prinsipalmente e bonchinan di

palu di Dividivi, Wabi i Indju i nan ta traha nan  
nèshi den e burakunan ku tin den e piedranan di  
kalki. Ora ku temporada di sekura yega nan ta  
kuminsá bai den direkshon di e kasnan. Esaki ta e  
momentu tambe ku nos por mira nan ta bula pasa  
banda di nos kasnan. E ora ei nan ta bai saboriá  
e frutanan ku tin den e palunan den nos kuránan.  
Prinsipalmente e frutanan di e palu di mango I  
kenepa. Ora ku nochí sera nan ta bai drumi tur  
huntu den e tòpnan di palunan haltu. Promé ku  
nan tur haña un lugá adekuá pa nan drumi, bo  
ta tende un bochincha inmenso. Ta manera kos  
ku nan ta konta otro kon nan dia a bai promé ku  
nan pega soño. I diripiente ta reina un silencio.  
E prikichinan a bai drumi. Ta hopi importante pa  
nos laga e lugánan di sosiego aki na pas.

### **Diferensha entre prikichi i lora**

Prikichinan ta pertenesé na e famia di lora. E famia aki, Psittacidae, ta konta ku  
350 sorto. Mayoria di e sortonan ta biba den klima tropikal i nan tin kolónan fèl  
masha bunita. E hembra i e machunan tin e mesun koló ku eksepshon di algun  
sorto.

Pero kiko ta e diferensha?

Na Antias Abou ta eksisti un tipo di lora ku ta e lora di Boneiru (Amazona bar-



### **Diferensha entre prikichi i lora**

badensis). Ora bo wak e lora aki I e bo pone e prikichi banda di dje bo ta mira e dieferensha mes ora. E lora ta mas grandi I su garganta ta mas kortiku. E bog den e pik ta mas pronunsia ku esun di prikichi. Ku e pik aki nan por krak nechi I simia sin problema. E alanan ta mas rondo I e rabu ta mas kortiku ku e prikichi. Tur lora tin un garganta fuerte i un pik kròm. Nan pik ta pèrmití nan kibra nechinan ku kaska basta duru pa asina nan por yega na nan kuminda. Lora ta e úniko paranan ku por hinka kuminda den nan boka ku nan pata. Tambe ta asina ku mayoria lora por subi bon na ophetonan òf tronkon di palu. Ora ku nan ta subi nan ta hasi uso di nan pik ku ta yuda nan..

Un lora su yu ta nase sunú, siegu i e no por yuda su mes. Despues di un siman e ta haña su promé plumanan i despues di mas o ménos un luna e ta haña su 'pluimveren'nan. Mayoria lora ta adulto ora ku e tin entre dos pa kuater aña.

Mes kos ku prikichi nan ta animalnan sosial ku ta biba den grupo grandi. Nan ta keda fiel na nan pareha henter nan bida.

Lamentablemente e paranan aki tambe ta masha gusta komo para di kouchi. Ta bon ku nan ta proteha for di anan 1952. asta ku e protekshon tin hende ta bende nan ilegalmente.

### **Menasanan**

Prikichinan ku ta biba den mondi no ta sosial ku hende. Nan ta preferá di bula bai pa motibu ku nan tin miedu. Mayoria prikichi no tin bon eksperensia ku hende. Hendenan ta yag riba e prikichinan pa nan bende nan pa bestia di kas. E prikichinan aki ta wòrdu saka muchu trempan for di nèshi. Ku esaki ta un kustumber malu di hende, ya ta konosí. Pa di promé, mayoria di e prikichi yòn aki ta muri i sin nan sobrebibí nan ta wòrdu poné den kouchinan muchu chikí.

E sakamentu di prikichi for di nèshi ta sosodé na un manera masha horroso. Hendenan ta hinka

bòter den e salida di e nèshi pa supuestamente e paranan yòn no bula bai. E mayornan no por yega serka e yunan mas pa duna nan kuminda i nan ta muri. E prikichinan ku wòrdu saká bibu for di e nèshi, mayoria bia no ta sobrebibí, pa motibu ku nan mester di kuminda ku hopi proteina ku nos, komo hende no por ofresé nan. Hendenan sa tira e nèshinan ku piedra kibra. E mayornan gritando ta sali bula, purbando na protehá na yunan.

Tambe sa sosodé ku e prikichinan ta wòrdu tirá ku skopèt di hagel ora nan ta bulando. Si e para sobrebibí e ta wòrdu bendé.

### **Kon mi por opservá e animalnan aki?**

Mayoria hende tin e suerte di haña prikichi di bishita den nan kura. Si bo ke e animalnan aki den bo kura bo mester planta palunan di fruta òf laga un wabi òf un Indju krese. Prikichi ta animal ku ta move hopi, nan no ta sinta ketu, I p'esei ta importante pa bi tin un vèrekeiker den besindario.

Ku esaki bo por mira nan bon, I bo por sigui nan ora nan bula di palu pa palu. Si bo skucha bon bo por tende nan gritamentu for djaleu. E ora ei bo por diskubrí si e animalnan ta bula den un grupo grandi òf solamentu den pareha di dos.

### **Bo ke sa mas?**

Riba Internet bo por haña hopi informashon tokante e prikichi, pero tene kuenta ku hopi informashon no ta korekto.

Bo por buska plachi riba e sitenan [www.google.nl](http://www.google.nl) òf [www.amazon.com](http://www.amazon.com).



Den buki tambe bo por haña informashon tokante e animal aki. Wak den e siguiente bukinan (bo por haña nan den Biblioteka Públiko òf den Bukhandel).

- Birds of the Netherlands Antilles, door Prof. Dr. K. H. Voous.
- Onze vogels, door Bart de Boer

Sponsored by:



